



**Broj:** 02-04-489/23

**Datum,** 06.04.2023. godine

**ZAPISNIK**  
**sa 25. redovne sjednice 7. saziva**  
**Općinskog vijeća Doboj Istok**

Dvadesetpeti redovna sjednica 7. saziva Općinskog vijeća održana je dana 30.03.2023. godine u zgradi općine Doboj Istok u Klokotnici sa početkom u 10,00 sati.

**PRISUTNI:** 16 vijećnika, Kemal Bratić, općinski načelnik, Omer Hadžić, savjetnik općinskog načelnika, Arnela Aljić, ovlaštenu državni službenik da obavlja poslove sekretara općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Admir Šišić, pomoćnik općinskog načelnika za društvene djelatnosti branilačko – invalidsku zaštitu i opću upravu, Amir Bradarić, predsjednik Savjeta mjesne zajednice Klokotnica, Agan Delić, predsjednik Savjeta mjesne zajednice Stanić Rijeka, Ermin Mujkanović, predsjednik Savjeta mjesne zajednice Brijesnica Velika i predsjednik Upravnog odbora Dobrovoljnog vatrogasnog društva Doboj Istok, Zijad Zahirović, sekretar mjesne zajednice Lukavica Rijeka, Rifet Mrkanović, predsjednik Udruženja penzionera općine Doboj Istok, Esad Bećirović, predstavnik udruženja Omladinski kulturni centar „Lipe“ Doboj Istok, Nevzeta Omerhodžić, predsjednica Udruženja žena Doboj Istok, Husein Šuvalić, predsjednik Općinske organizacije Crvenog križa Doboj Istok i predstavnik Organizacije demobilisanih boraca općine Doboj Istok, Izet Škrebo, predsjednik Organizacije ratnih vojnih invalida općine Doboj Istok, Senad Batalević, predsjednik Udruženja građana dobitnika najvećih ratnih priznanja općine Doboj Istok, Hava Mešić, predsjednica Organizacije porodica šehida i poginulih boraca općine Doboj Istok, te Fahrudin Kurtović, predstavnik RTVTK.

**ODSUTNI:** Senada Džanić, vijećnica SBB.

Sjednicu je otvorio i vodio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Uvaženi vijećnici, uvaženi načelnice, pomoćnici načelnika, predstavnici udruženja građana, predstavnici mjesnih zajednica, ostali gosti i mediji ja vas sve srdačno selamim i pozdravljam. Prije nego otvorim 25. sjednicu zamolio bih tehničku službu da utvrdi kvorum. Prisutno je 16 vijećnika.“

**USVAJANJE ZAPISNIKA SA PRETHODNE SJEDNICE OPĆINSKOG VIJEĆA**

Nusret Dautović, predsjedavajući Općinskog vijeća: „Dobili ste Zapisnik sa prošle sjednice i stavljam zapisnik na razmatranje. Javlja li se neko za riječ? Ukoliko se niko ne javlja, ko je za ovakav zapisnik?“  
 Glasanje: ZA – 16, PROTIV – 0, UZDRŽANIH – 0.

**VIJEĆNIČKA PITANJA**

Nusret Dautović, predsjedavajući Općinskog vijeća: „Javlja li se neko po vijećničkim pitanjima? Ukoliko nema, zatvaram vijećnička pitanja.“

## **USVAJANJE DNEVNOG REDA**

Nusret Dautović, predsjedavajući Općinskog vijeća: „ Za današnji dnevni red bilo je planirano 12. tačka, ali smo dobili prijedlog za proširenje dnevnog reda sa tri tačke:

1. Razmatranje i usvajanje Prijedloga Odluke o finansiranju rekonstrukcije dijela lokalnog puta zaseok Haskići- Hodžići u Stanić Rijeci
2. Razmatranje i usvajanje Prijedloga Odluke o učešću u akciji rekonstrukcije dijela tribina na stadionu Luke u Klokočnici
3. Razmatranje i usvajanje Prijedloga Odluke o učešću u akciji Mjesne zajednice Lukavica Rijeka za rješavanje stambenog pitanja socijalno-ugroženih kategorija

Znači današnji dnevni red bi se proširio za tri tačke. Ko je za proširenje dnevnog reda sa ove tri tačke?  
 Glasanje: ZA – 16, PROTIV – 0, UZDRŽANIH – 0.

Ja bih predložio da ove tri tačke koje su u proširenju dnevnog reda idu kao prve tačke, pa bi dnevni red za današnju 25. redovnu sjednicu 7. saziva izgledao ovako:

1. Razmatranje i usvajanje Prijedloga Odluke o finansiranju rekonstrukcije dijela lokalnog puta zaseok Haskići- Hodžići u Stanić Rijeci
2. Razmatranje i usvajanje Prijedloga Odluke o učešću u akciji rekonstrukcije dijela tribina na stadionu Luke u Klokočnici
3. Razmatranje i usvajanje Prijedloga Odluke o učešću u akciji Mjesne zajednice Lukavica Rijeka za rješavanje stambenog pitanja socijalno-ugroženih kategorija
4. Razmatranje i usvajanje prijedloga Odluke o prihvatanju prava svojine i posjeda na parceli k.č. broj 3644/7 K.O. Klokočnica
5. Razmatranje i usvajanje Izvještaja o izmjenama i dopunama Izvještaja o realizaciji Programa rada Općinskog vijeća Doboj Istok za 2022. godinu,
6. Razmatranje i usvajanje Izvještaja o radu Općinskog načelnika za 2022. godinu
7. Razmatranje i usvajanje Izvještaja o radu komisija Općinskog vijeća Doboj Istok za 2022. godinu
8. Razmatranje i usvajanje Rezultata mjerenja zadovoljstva građana javnim uslugama
9. Razmatranje i usvajanje Izvještaja o radu i finansijskom poslovanju Savjeta Mjesne zajednice Klokočnica za 2022. godinu sa završnim računom
10. Razmatranje i usvajanje Izvještaja o radu i finansijskom poslovanju Savjeta Mjesne zajednice Brijesnica Velika za 2022. godinu sa završnim računom
11. Razmatranje i usvajanje Izvještaja o radu i finansijskom poslovanju Savjeta Mjesne zajednice Brijesnica Mala za 2022. godinu sa završnim računom
12. Razmatranje i usvajanje Izvještaja o radu i finansijskom poslovanju Savjeta Mjesne zajednice Stanić Rijeka za 2022. godinu sa završnim računom
13. Razmatranje i usvajanje Izvještaja o radu i finansijskom poslovanju Savjeta Mjesne zajednice Lukavica Rijeka za 2022. godinu sa završnim računom
14. Razmatranje i usvajanje Izvještaja udruženja građana o utrošku dodijeljenih budžetskih sredstava za 2022. godinu sa dokazima o utrošenim sredstvima
15. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana općine Doboj Istok.

Ko je za ovakav predloženi dnevni red?“  
 Glasanje: ZA – 16, PROTIV – 0, UZDRŽANIH – 0.

## **REALIZACIJA DNEVNOG REDA**

### **1. Razmatranje i usvajanje Odluke o finansiranju rekonstrukcije dijela lokalnog puta zaseok Haskići- Hodžići u Stanić Rijeci**

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ukoliko se niko ne javlja ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0.

**2. Razmatranje i usvajanje Prijedloga Odluke o učešću u akciji rekonstrukcije dijela tribina na stadionu Luke u Klokočnici**

Nusret Dautović, predsjedavajući Općinskog vijeća: „Javlja li se neko za riječ? Ukoliko se niko ne javlja ko je za usvajanje prijedloga Odluke o učešću u rekonstrukciji?“

Glasanje: ZA – 16, PROTIV – 0, UZDRŽANIH – 0.

**3. Razmatranje i usvajanje Prijedloga Odluke o učešću u akciji Mjesne zajednice Lukavica Rijeka za rješavanje stambenog pitanja socijalno-ugroženih kategorija**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ukoliko se niko ne javlja ko je za ovaj prijedlog Odluke?“

Glasanje: ZA – 16, PROTIV – 0, UZDRŽANIH – 0.

**4. Razmatranje i usvajanje Prijedloga Odluke o prihvatanju prava svojine i posjeda na parceli k.č. broj 3644/7 K.O. Klokočnica**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ne javlja se niko. Ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0.

**5. Razmatranje i usvajanje Izvještaja o izmjenama i dopunama Izvještaja o realizaciji Programa rada Općinskog vijeća Doboj Istok za 2022. godinu**

Nusret Dautović, predsjedavajući Općinskog vijeća: „Javlja li se neko za riječ? Ne javlja se niko. Ko je za ovakav prijedlog izmjene Izvještaja?“

Glasanje: ZA – 16, PROTIV – 0, UZDRŽANIH – 0.

**6. Razmatranje i usvajanje Izvještaja o radu Općinskog načelnika za 2022. godinu**

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ukoliko se ne javlja, ko je za usvajanje ovakvog Izvještaja?“

Glasanje: ZA – 16, PROTIV – 0, UZDRŽANIH – 0.

**7. Razmatranje i usvajanje Izvještaja o radu komisija Općinskog vijeća Doboj Istok za 2022. godinu**

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Emira Karić, predsjednica kluba vijećnika SDP: „Srdačno bih poselamila sve prisutne. Baš mi je drago što je ova tačka nakon nekoliko godina došla na dnevni red da imamo priliku diskutirati o radu komisija. Ja neću diskutirati o radu ostalih komisija nego ću samo diskutirati o radu komisije u kojoj sam ja predsjednik, a to je Komisija za jednakopravnost spolova. Ja ću ovdje morati istaći određene probleme i nadam se da ćemo se razumjeti nakon moje diskusije. Pročitala sam određena istraživanja od strane OSCE-a i nekih nevladinih organizacija, bila je 21 općina uvrštena i zapravo govore o neefikasnosti rada komisija za jednakopravnost spolova. Što se tiče ove komisije u općini Doboj Istok ona je, moram reći, desetljećima zamrznuta. Takođe su istraživanja pokazala da su u komisijama ljudi, neću reći da nisu kompetentni, ali kaže se da nisu dovoljno educirani da budu u toj komisiji. Ja sam se upisala na Akademiju rodne ravnopravnosti i nakon godinu dana završila sam tu akademiju i posložila neke kockice u glavi. Isto tako ta istraživanja su govorila o tim općinama kako je to kozmetičko djelovanje. Ja ne mogu sebe natjerati na bilo kakvo kozmetičko djelovanje ili djelovanje pro forme, pa ću ovdje istaći šta bi trebalo i u narednom periodu očekujem zajedno sa onim koga ću ovdje ne kažem pozvati, ali na neki način spomenuti, jer komisija nema alate. Jedan od najvažnijih alata je džender akcioni plan, a to je jedan ozbiljan dokument. Ja ću krenuti u realizaciju da mi usvojimo džender akcioni plan, ali stvarno moram imati podršku od strane pravne službe i ostalih službi. Takođe Komisija za jednakopravnost spolova je jedna od rijetkih komisija koja traži svoj budžet. Ja ću vam pokazati istraživanja koja su govorila,

*ali ona nema budžet i ona jednostavno nema svoje forme djelovanja. Mi ćemo se sastati i otprilike vidjet ćemo šta bi se i kako bi se moglo unaprijediti, hajmo reći, sa najviše rada, a sa najmanje tih nekih materijalnih sredstava, ali kažem očekujem podršku i od općinskih službi i od načelnika, jer kod njega su ruke kada je u pitanju budžet i da zaista počne djelovati ova komisija. Ako budem na neke negativne strane došla onda će i dalje ova komisija biti zamrznuta.“*

*Hasan Hasančević, predsjednik kluba vijećnika SDA: „ Uvaženi predsjedavajući, zamjeniče, kolege i kolegice, načelnice sa saradnicima. Ne znam da li bih ispravljao ili bih se držao tačke dnevnog reda. Uvažena kolegica je pričala i vidite rad komisije čiji je ona predsjednik, a druge komisije koje su u Općinskom vijeću imaju tamo po 20 – 30 sastanaka ne čekajući neke džendere, smrzavanja i zamrzavanja. Mi trebamo raditi, jer nemam ja ništa protiv ni educiranja ni svega. Svaka komisija naiđe na problem u svom radu i svima treba budžet. Znači mi se naslanjamo na općinski budžet po raznim pitanjima i kada donesemo zaključke komisija treba da prosljedimo kuda treba. Ne znam ja šta treba njenoj komisiji, a ni načelnik ne zna dok ne dođe do njega to, pa da ne prodajemo maglu, nego da se uhvatimo rada. Ako komisija nije popunjena, ako ne dolaze vijećnici ili vijećnice ili spoljni saradnici, jer 100 puta smo pričali treba to popuniti i raditi, ali ovo pričanje je magla.“*

*Emira Karić, predsjednica kluba vijećnika SDP: „ Vrlo kratko. Ko me je razumio, razumio, a ko nije razumio nije razumio. Ja sam član Komisije za statut i propise i imam sve pluseve u toj komisiji što znači da se odazivam redovno na taj rad.“*

*Kemal Skopljak, predsjednik kluba vijećnika SBB-BPS: „ Prije svega želim da pozdravim i poselamim sve prisutne. Ja ću se osvrnuti na rad komisije kojoj sam ja predsjednik, znači izvještaj o radu Komisije za korupciju i nevladin sektor. U prošloj godini imali smo dva sastanka Komisije za korupciju i nevladin sektor. Raspravljali smo o jednom slučaju koji je bio dosta zahtjevan, a radilo se o prijavi koja se odnosila na nezakonito zapošljavanje. Znači odradili smo sav posao kako treba tj. ispoštovali smo proceduru maksimalno i na kraju se ispostavilo da nije bilo povrede u postupku prijema radnika u radni odnos što je jako bitno kada se radi o ovim stvarima. Znači puno papira smo sabrali, puno izjava smo uzeli da bi došli do ovakvog zaključka i na kraju smo dali jednu preporuku svim javnim ustanovama, a pogotovo se ovo odnosilo na Dom zdravlja. Znači preporuka direktoru da prilikom zapošljavanja vodi računa o prioritetima koji su propisani Zakonom o dopunskim pravima boračkih populacija. Što znači da se uvijek obrati pažnja vezano za boračke populacije.“*

*Nusret Dautović, predsjedavajući Općinskog vijeća: „ Hvala lijepo, Kemale. Javlja li se još neko za riječ po ovoj tački? Ukoliko se niko ne javlja, ko je za ovakve izvještaje komisija?“*

*Glasanje: ZA – 16, PROTIV – 0, UZDRŽANIH – 0.*

## **8. Razmatranje i usvajanje Rezultata mjerenja zadovoljstva građana javnim uslugama**

*Nusret Dautović, predsjedavajući Općinskog vijeća: „ Javlja li se neko za riječ?“*

*Emira Karić, predsjednica kluba vijećnika SDP: „ Dobili smo tabele, dijagrame i ja ću prvo postaviti pitanje što se tiče prve tabele na prvoj stranici gdje kaže da je ovo tabela uporednog pregleda. Nisam razumjela ovu tabelu, uporednog sa čime, sa prošlom godinom, pa plus, minus i samo da ste to naglasili, a pretpostavljala jesam, ali bi se trebalo i naglasiti. Isto tako da kažem ovo 50 % i niže i možda bi se trebalo diskutirati o tome, jer znači da 50% građana nije zadovoljno radom ambulante i radom mjesne zajednice. Mi danas imamo tačke izvještaji o radu mjesnih zajednica i oni su na neki način bogati, ali naši građani, bar uzorak koji je anketiran je rekao da nije zadovoljan, odnosno pola nije zadovoljno sa radom mjesnih zajednica. O sportskim i kulturnim dešavanjima smo pričali i prošle godine kada je ova tačka bila i baš smo bili opširni. Pomakla su se ta sportska dešavanja, a kulturna ne baš, ali sportska da i to mi je drago. Možemo imati priliku da vidimo te neke pune dvorane na našoj općini. Isto tako ne razumijem kanalizacija i cijena kanalizacije, nisam znala da se naplaćuje kanalizacija na našoj općini.“*

*Nusret Dautović, predsjedavajući Općinskog vijeća: „ Hvala lijepo, Emira. Javlja li se još neko za riječ po ovoj tački? Ukoliko se niko ne javlja ko je za ovakve Rezultate zadovoljstva građana javnim uslugama?“*

*Glasanje: ZA – 16, PROTIV – 0, UZDRŽANIH – 0.*

## **9. Razmatranje i usvajanje Izvještaja o radu i finansijskom poslovanju Savjeta Mjesne zajednice Klokočnica za 2022. godinu sa završnim računom**

Nusret Dautović, predsjedavajući Općinskog vijeća: „Javlja li se neko za riječ?“

Amir Bradarić, predsjednik Savjeta mjesne zajednice Klokočnica: „Poštovani prisutni, uvaženi načelnice, uvaženi vijećnici, uvaženi predstavnici organizacija i općinskih službi esalamu alejkum i dobar dan. Osjećam potrebu da moram reći par rečenica u vezi rada mjesne zajednice za proteklu godinu. Želio bih skrenuti pažnju u vezi ovog budžeta pošto često imamo priliku čuti da jedni stvaraju pogrešnu sliku o budžetu mjesne zajednice Klokočnica i samo da razjasnimo par stvari vezano za budžet. Pošto ovdje vidimo da su prihodi 204.827 KM i to su zapravo sva sredstva koja prođu kroz finansije mjesne zajednice Klokočnica. Međutim, da malo razjasnimo mi imamo prihode od nekih 64.000 KM i dotaciju za rad od općine oko 4.200 KM, tako da je stvarni budžet oko 70.000 KM. Da ne bi stvorili pogrešnu sliku o budžetu mjesne zajednice Klokočnica želim samo pojasniti i skrenuti pažnju na te stvari. Dakle, sva ostala sredstva su prilozi građana, zatim imamo sredstva za javnu rasvjetu od općine koja iznosi oko 61.000 KM za prošlu godinu. Reći ću još par stvari šta smo mi radili kao Savjet mjesne zajednice tj. na šta smo obraćali pažnju. Činjenica je da su mjesne zajednice unazad par godina bile dosta zapostavljene i one kao najniži stub lokalne samouprave bile su često zanemarene. Evo hvala bogu dolazi vrijeme kada se sve veća pažnja posvećuje mjesnim zajednicama kao važnim ulogama u društvu i razvoju zajednice. Ja ću ponoviti, a par puta sam to govorio, da su one naša ulazna vrata i naš prag kuće. Mi kao Savjet mjesne zajednice Klokočnica nastojali smo biti u suštini servis svim građanima Klokočnice u proteklom periodu preko kojeg su naši mještani imali priliku da učestvuju i odlučuju o pitanjima vezanim za život i rad na njihovom području. Mi kao Savjet mjesne zajednice Klokočnica nastavljamo da budemo istinski servis i u 2023. godini i za početak smo uradili jednu analizu, odnosno anketiranje mještana Klokočnice. Mi svi znamo da Klokočnica po zadnjem popisu iz 2014. godine broji negdje oko 5.144 stanovnika i ujedno je i najbrojnija, pa smo ispitali negdje oko 10% stanovništva u tom anketiranju kako preko gugl upitnika, tako i direktno fejs to fejs. Po tom upitniku vidjeli smo da su najvažniji resursi mladi ljudi i mi ćemo posvetiti najveću pažnju tim mladim ljudima. Za početak zajedničkim snagama odlučili smo sa raznim udruženjima sa područja Klokočnice aktivirati se u mrežu aktivnih zajednica Tuzlanskog kantona gdje će imati priliku mladi da aktivno učestvuju u radu i razvoju naše zajednice, tj. stvaranju nekog akcionog plana naše zajednice za 2023. godinu. Mi ćemo međusobnim razumijevanjem, zajedničkim radom, trudom i zalaganjem nastojati stvoriti ljepši ambijent življenja i zadovoljnih ljudi.“

Emira Karić, predsjednica kluba vijećnika SDP: „Sa uvodnim dijelom se slažem prethodnog govornika, jer mislim da sam zaista 100 puta govorila kako je to osnovna ćelija društva, prva vrata itd. i tu stvarno rad treba da bude aktivan. Dobili smo jedan sadržajan izvještaj i naravno prihvatljiv izvještaj. Baš sam ga pročitala od slova do slova i drago mi je da se ovako radi u mjesnoj zajednici Klokočnica, jer sada raspravljamo o ovoj tački. Takođe zalažem se i zalagat ću se za povećanje tranše za mjesne zajednice. Ono što je neophodno i to jako brzo uraditi je da se usaglase statuti naravno sa određenim izmjenama. Isto tako po meni je jedan problem što se negdje radi volonterski, a negdje se plaća. Koliko se plaća, plaća se, a i to je vjerovatno minimalno i smatram da bi to trebalo biti jednako u svim mjesnim zajednicama, odnosno da svi savjeti donesu odluke da se članovima savjeta plati određena naknada za njihov rad.“

Nusret Dautović, predsjedavajući Općinskog vijeća: „Hvala lijepo, Emira. Javlja li se neko za riječ po ovoj tački? Ukoliko se niko ne javlja, ko je za ovakav Izvještaj Savjeta mjesne zajednice Klokočnica?

Glasanje: ZA – 16, PROTIV – 0, UZDRŽANIH – 0.

## **10. Razmatranje i usvajanje Izvještaja o radu i finansijskom poslovanju Savjeta Mjesne zajednice Brijesnica Velika za 2022. godinu sa završnim računom**

Nusret Dautović, predsjedavajući Općinskog vijeća: „Javlja li se neko za riječ?“

Kemal Skopljak, predsjednik kluba vijećnika SBB-BPS: „Pošto ja dolazim iz mjesne zajednice Brijesnica Velika želim da pohvalim dosadašnji rad, jer ovo sve što je nabrojano i što je urađeno u prošloj godini mislim da je rijetko kada urađeno ovako dosta posla. Bilo je većih poslova, ali ovo je sve smišljeno i lijepo urađeno. Želim im sve najbolje u daljem radu i da nastave ovako kako su započeli.“

Nusret Dautović, predsjedavajući Općinskog vijeća: „ Hvala lijepo, Kemale. Ukoliko se niko ne javlja ko je za ovakav Izvještaj mjesne zajednice?“

Glasanje: ZA – 16, PROTIV – 0, UZDRŽANIH – 0.

**11. Razmatranje i usvajanje Izvještaja o radu i finansijskom poslovanju Savjeta Mjesne zajednice Brijesnica Mala za 2022. godinu sa završnim računom**

Nusret Dautović, predsjedavajući Općinskog vijeća: „ Javlja li se neko za riječ?“

Emira Karić, predsjednica kluba vijećnika SDP: „ Izvještaj o radu mjesne zajednice Brijesnica Mala nešto je manje sadržajan, ali isto tako nije neprihvatljiv i naravno da će klub SDP prihvatiti ovaj izvještaj. Morat ću dati određenu opasku, jer imamo člana među vijećnicima koliko smo se borili na dan izbora ja sam zaista mislila da će ovo da bude savršenstvo od rada, ali eto i dalje su nam šturi izvještaji iz mjesne zajednice Brijesnica Mala.“

Nusret Dautović, predsjedavajući Općinskog vijeća: „ Hvala lijepo, Emira. Javlja li se još neko za riječ? Ukoliko se ne javlja, ko je za ovakav Izvještaj mjesne zajednice Mala Brijesnica?“

Glasanje: ZA – 16, PROTIV – 0, UZDRŽANIH – 0.

**12. Razmatranje i usvajanje Izvještaja o radu i finansijskom poslovanju Savjeta Mjesne zajednice Stanić Rijeka za 2022. godinu sa završnim računom**

Nusret Dautović, predsjedavajući Općinskog vijeća: „ Javlja li se neko za riječ po ovoj tački?“

Agan Delić, predsjednik Savjeta mjesne zajednice Stanić Rijeka: „ Poštovani vijećnici, gospodine načelnice, gospodo pomoćnici selam alejkum i dobar dan. Ja imam potrebu u vezi izvještaja naglasiti zadovoljstvo i zahvalnost građana Stanić Rijeke za rekordnu prošlu godinu u smislu infrastrukturnih projekata koji su urađeni u Stanić Rijeci, jer moje mjesto definitivno postaje mjesto ugodnog življenja. Naravno procesi nikada nisu završeni i nikada nisu dobri da ne mogu biti bolji. U mom izvještaju navedeno je par projekata koji su realizovani veoma uspješno i jedan projekat koji sam ja zaboravio spomenuti je proširenje javne rasvjete. Ja se ispričavam zbog toga, jednostavno se desio previd. I taj dio je uspješno realizovan, ostalo je par repova, jer ćemo iz budžeta riješiti i dva sokaka. Nekada imam utisak kao da smo u Parizu koliko svijetli i čudi me da građani izražavaju nezadovoljstvo radom mjesnih zajednica i svega ostalog, a slomismo se ulažući i radeći, ali o tom potom, to su subjektivni stavovi da li je zadovoljan ili nije zadovoljan. Ja ovom prilikom izražavam zadovoljstvo i zahvalnost prije svega članovima savjeta sa kojima radim, jer to su divni ljudi i kompetentni. Izražavam zahvalnost vama općinskim vijećnicima za kvalitetno sagledavanje i kvalitetno donošenje odluka i općinskom načelniku sa pomoćnicima koji su nam puno pomogli u vertikalni apliciranja za te projekte. Nemam više ništa dodati osim da idemo dalje.“

Nusret Dautović, predsjedavajući Općinskog vijeća: „ Hvala lijepo, Deliću. Javlja li se još neko za riječ? Ukoliko se niko ne javlja, stavljam na usvajanje Izvještaj o radu Savjeta mjesne zajednice. Ko je za?“

Glasanje: ZA – 16, PROTIV – 0, UZDRŽANIH – 0.

Zerina Subašić je napustila sjednicu (opravdano)

**13. Razmatranje i usvajanje Izvještaja o radu i finansijskom poslovanju Savjeta Mjesne zajednice Lukavica Rijeka za 2022. godinu sa završnim računom**

Nusret Dautović, predsjedavajući Općinskog vijeća: „ Javlja li se neko za riječ? Niko se ne javlja, ko je za ovakav Izvještaj Savjeta mjesne zajednice Lukavica Rijeka?“

Glasanje: ZA – 16, PROTIV – 0, UZDRŽANIH – 0.

**14. Razmatranje i usvajanje Izvještaja udruženja građana o utrošku dodijeljenih budžetskih sredstava za 2022. godinu sa dokazima o utrošenim sredstvima**

Nusret Dautović, predsjedavajući Općinskog vijeća: „ Javlja li se neko za riječ?“

*Emira Karić, predsjednica kluba vijećnika SDP: „Kada su u pitanju udruženja građana, dobro je što postoje, jer vi ste korektori društva i nastavite svoje djelovanje, proširujete svoje sadržaje, a mi smo tu da vas u svakom slučaju podržimo.“*

*Nusret Dautović, predsjedavajući Općinskog vijeća: „Hvala lijepo, Emira. Javlja li se još neko za riječ po ovoj tački? Ukoliko se niko ne javlja, ko je za ovakav izvještaj udruženja građana?“*  
*Glasanje: ZA – 15, PROTIV – 0, UZDRŽANIH – 0.*

### **15. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana općine Doboj Istok.**

*Nusret Dautović, predsjedavajući Općinskog vijeća: „Javlja li se neko po ovoj tački za riječ?“*

*Emira Karić, predsjednica kluba vijećnika SDP: „Te provedene aktivnosti imaju neku svoju ustaljenu formu i da li bi trebalo više ili manje, ja sam uvijek za neku promjenu, za nešto drugačije ali za sada imamo tu ustaljenu formu. Ja sam se javila samo iz razloga što sam odolila da se javim na tim svečanim sjednicama, jer mislim da mi nije bio red da se javim tada i čekala sam upravo ovu tačku i evo kratko ću da kažem. Osoba ili gospodin koji nam drži referat, odnosno historijski čas ili šta već ja samo molim da se drži tih nekih historijskih dijelova i da ne govori neku političku analizu. Teške su ovdje riječi rečene i da se neće proslavljati 25.11. i da ne nabrajam. Ja sam ga pomno slušala i bilo mi je zaista iritantno za neke stvari. Neke pozdravljam, jer se uvijek volim vratiti u prošlost i sagledati neke stvari iz prošlosti, ali preko nekih riječi teško da se može preći. Mislim da bi trebalo kao neku korekciju uraditi ili neku provjeru o čemu će se pričati javno za govornicom.“*

*Hasan Hasančević, predsjednik kluba vijećnika SDA: „Ako se sjećate dosadašnjeg rada kada smo zvali komandante da drže predavanje za Dan brigade, istoričare nismo mogli naći nikoga i ja to znam, jer lično sam uručivao pozivnice, pa između ostalog išlo se i do Čelića. Dovedeš insana i stručnjaka istoričara i ne paše, a iznosi istorijske fakte i činjenice. Smatram, uvažena kolegice, da ste na svečanoj sjednici trebali izaći i demantovati sve što vas je iritiralo ili ne daj bože uvrijedilo. Mislim da su predsjedavajući ili zamjenik kazali da se može obratiti svako od prisutnih. Znači ako vas je povrijedila priča istoričara, neću mu reći ni ime ni prezime, koji je adekvatno završio fakultet, adekvatno predaje i uči našu djecu u srednjoj školi u Brijesnici Velikoj i ne vidim nikakav razlog za ovakvu priču.“*

*Haris Sinanović, predsjednik kluba vijećnika SDP-SBiH: „Poštovanje predsjedavajući, uvaženi načelnice, općinski vijećnici i ostali gosti. Kolega Hasane, niko nije ni spomenuo da njegova diploma nije važeća i podržavam kolegicu Emiru u ovome što je iznijela. Navest ću samo jedan primjer koji apsolutno nije bio u sklopu historijskih činjenica. Za ovom govornicom je spomenut pjano ustaša u Gračanici i kako su naši neki ljudi Bošnjaci koji su u II svjetskom ratu bili pripadnici ustaških postrojbi i kako oni nisu znali ni o čemu se radi, ni ko je Ante Pavelić, ni šta je ustaški pokret i na neki način je pravdao te pripadnike bošnjačkog naroda koji su bili u ustaškim postrojbama. Za ovom govornicom je to rečeno.“*

*Emira Karić, predsjednica kluba vijećnika SDP: „Dakako da ne govorimo o ničijoj diplomi, jer je zaista kolega sadržajan i u 99 % njegove sadržajnosti, odnosno onoga što je pripremio za taj historijski čas ja sa oduševljenjem pratim, ali ne mogu dozvoliti političku analizu. Analitiku ostavljamo za neku emisiju, neki portal, pa neka iznese. U pravu ste, evo koristit ću taj alat da se javim i da neke stvari demantujem, ali mislim da ćemo na taj način uništiti tu svečanost da li sjednice ili bilo čega.“*

*Hasan Hasančević, predsjednik kluba vijećnika SDA: „Često za ovom govornicom izgovaramo rečenice ko je razumio razumio. Ja ću sada ponoviti, uvaženi profesor je kazao šta je trebao kazati i što je mislio da je poruka građanima Doboja Istoka, ko je razumio razumio i to je tako.“*

*Kemal Bratić, općinski načelnik: „Ja želim prije svega sve da vas poselamim i da vam zaželim da ostatak ramazana provedete u rahatluku i da vam lagano prođe. Kada nemamo nešto mi nađemo i zato smo specijalci da nađemo nekakav problem, da raspravljamo i da se hrvemo međusobno. Nije to dobro. Ja sam profesorovo predavanje itekako razumio i ovo što uvaženi vijećnik Haris spominje govorio je i mislio na neosvijestenu Bošnjaka da nisu znali i nije nikoga pravdao. Ovo što uvažena vijećnica Emira govori ne možemo mi tražiti cenzuru, cenzure su nekada prije bile. Ne možemo nikome reći dajte da pregledamo šta ćeš ti za govornicom*

*pričati, ali isto tako se slažem da nije dobro na svečanim sjednicama da bude nekakvih replika. Ja uzimam na sebe da malo profesoru skrenem mada ja mislim da ništa nije bilo suvišno, ko ga je pažljivo slušao i dobro shvatio i razumio. Ja ću mu skrenuti pažnju, mada je on samo nabrajao istorijske činjenice i po meni ništa nije bilo viška. Sa moje strane gledišta, a smatram sebe patriotom i nekoga ko dobro shvata i doživljava i sadašnju situaciju u Bosni i Hercegovini i evo dijelom razumijem i taj historijski dio. Molim vas nemojte sada u vrijeme ramazana da idemo repliku na repliku. Prije svega čestitam vam na efikasnosti u ovom Vijeću, čestitam svim savjetima mjesnih zajednica i udruženjima i dajte da to ostavimo za neki drugi put i da prekinemo sa time.“*

*Nusret Dautović, predsjedavajući Općinskog vijeća: „ Hvala lijepo, gospodine načelniče. Javlja li se još neko za riječ? Ukoliko se ne javlja, ko je za ovakvu Informaciju o provedenim aktivnostima?“*

*Glasanje: ZA – 12, PROTIV – 0, UZDRŽANIH – 3.*

*Sa ovom tačkom smo iscrpili današnji dnevni red i zahvaljujem se svim vijećnicima i ostalim gostima na prisustvu.“*

*Sjednica je završena u 10,45 sati.*

*ZAPISNIČAR  
Behara Hadžić*

*OVLAŠTENI DRŽAVNI SLUŽBENIK  
DA OBAVLJA POSLOVE SEKRETARA OPĆINE  
Arnela Aljić*

*PREDSJEDAVALJUĆI  
OPĆINSKOG VIJEĆA  
Nusret Dautović*

*Zapisnik je usvojen na 26. redovnoj sjednici Općinskog vijeća Doboj Istok održanoj dana 27.04.2023. godine.*

*U Klokotnici, dana 27.04.2023. godine*

*Zabilješku sačinila  
Arnela Aljić, ovlašteni državni službenik da  
obavlja poslove sekretara općine*